

rendissima per tratar questa materia etc. Et cussi levati, il Principe con tutto il Colegio lo accompagnoe fino a la riva a montar in li piati, et cussi l'orator pontificio et li altri episcopi, et nui deputati fino a San Zorzi etc.

Fono electi per Colegio 4 a tratar con dito cardinal, *videlicet* sier Lunardo Mozenigo, sier Zorzi Emo savii dil Consejo, sier Piero Lando et sier Alvisè Pixani savii a terra ferma, i quali ozi andono da dito cardinal.

In questo zorno fo il perdon al Santo Sepulero, dove, in questo anno, è stà fato quel sepulero marmoreo in mezo, opera molto degna e di gran spexa. Non si sa chi habi fato la spexa et elevato il monastero di monache religiose, e si va ampliando; siehè ozi è il perdon di colpa e di pena.

Fu fatto *etiam* procession a Castello di le scuole e le 9 congregation, et portato sotto una umbrella la †, qual questo reverendissimo domino Antonio Contarini, secondo patriarcha, à fato far adornata molto, che fu di certe reliquie fu date al tempo di domino Antonio Surian patriarcha, et stete cussi in certa caseta in sacrestia. Poi per questo patriarcha aperta, trovano cosse molto degne, qual esso reverendissimo patriarcha me le mostroe in li di passati, *videlicet* di peli di la barba di Christo, di chiodi di la † e altre reliquie con letere intaiade antiche, et una poliza par a tempo di papa Alexandro si ave dita croceta. Hor è stà fato una capella in San Piero di Castello, et ozi posta la dita reliquia, over †, con altre reliquie trovate in dito altar di la vesta di la Madona, di ossi di San Lorenzo e San Theodoro; fo assaissima zente. Era col patriarcha drio tre episcopi, non però aparati, *videlicet* il Saracho di Nepanto, el Brocheta di Coranto, el Franceschi di Coron, tutti tre senza vescoadi per esser quelle terre in man dil Turecho.

Da poi disnar, *etiam* fo Colegio di savii *ad consulendum*, et non fu fato Consejo per non esser voxe di far. Questa matina *etiam* ai Frari Menori s'è mostrato il sangue di Christo, qual portò sier Marchio Trivixan da Constantinopoli, che si mostra ogni anno in tal zorno et la domenega di l'Olivo.

28* A dì 29, la matina. Nulla fu da conto, et in quarantia criminal fo preso di retenir uno nominato, era prior di Lazareto nuovo, menato per sier Francesco da Leze, sier Pangrati Dolfin e sier Nicolò Soranzo, provedadori sopra la sanità. Et parlò il Leze. Questo prior vegniva a Venexia la note da una sua ch'el teniva, e avanti di tornava a Lazareto; diceva aver 150 boche, non ne haveva 70, deva

licentia a quelli erano menati li, stati 4 et 5 zorni, che doveva star 40, feva vender robe state a Lazareto nuovo, feva vegnir persone sane a Lazareto, e fate noze li e balato. Havia uno nepote che veniva li e usava con done era in dito locho, e altri manchamenti ha fato; et fu preso, di tutte le balote, di retenirlo, et cussi fo retenuto, et si torà il suo costituito.

Noto. In questi zorni, vene in Colegio maistro Maurizio lezeva a Padoa in, qual è frate, sta a Santo Job, et è fato vescovo de Hibernia, et disse che li-avanzava alcune bolete dil suo lezer a Padoa, et dovendo andar a Roma al Concilio, non havendo il modo, pregava la Signoria li desse qualche dinaro, e fo ballota di darli ducati 25. È preso.

Da poi disnar, fo Consejo di X con la zonta et fu preso che sier Silvestro Memo, sier Marco Antonio Sanudo, sier Andrea Dolfin electi savii ai ordeni; quali non hannò la età di anni 30, che atento il bisogno presente, sia acceptà la sua oblation di prestar a la Signoria ducati 200 *de presenti*, da esser scontadi da poi un anno a ducati 50 per angaria loro; et fu presa.

Fu *etiam* asolto uno padoan, era canzelier a Miran, qual è anni 3 stato in prexon. *Etiam* feno altro.

Morite ozi in questa terra maistro Francesco da le Valle doctor, excellentissimo medico; siehè hora mai la terra de medici è venuta in niente.

Dil provedador Capello, da Vicenza, fo lettere, di eri

A dì 30, la matina, fo lettere di Vicenza, 29 *dil provedador Capello, di eri*. Dil receiver ducati 2000: è pochi. *Item*, lettere aute di Mantova, come missier Zuan Jacomo Triulzi a Milan stava in *extremis*, et altri diceva era morto etc., con altre particolarità, come dirò di sotto. Francesi molto grossi, alozati a Bentivoy, e voleno venir con spagnoli a la zornata, quali erano retrati verso Lugo e Bagna Cavallo.

Da poi disnar, fo Pregadi per expedir Piero Brexan e darli risposta a le proposition di lo acordo fato per il Triulzi.

Fo leto molto lettere dil provedador Capello e di sier Marin Zorzi dottor.

Fu posto, per i consieri e savii, di contraccambiar monsignor di la Roxa con sier Andrea Gritti procurator, è prexon a Milan. Ave 48 di no, 136 di sì.